

- केंद्रीय गृहमंत्री अमित शाह प्रदेश रा विकास मांय बेहतर कानून व्यवस्था ने घणी खास बतायी-जयपुर मांय करीब 10 हजार सिपाहियां ने नौकरी लागण रा कागजात संप्या।
- प्रदेश मांय 12 जनवरी ऊँ ऑनलाइन 'घुमन्तु पहचान प्रमाण पत्र' बणावण सारू शिविर लगाया जावेला।
- राज्य रा घणखर हलका ज़ोरदार ठारी री फेंट मांय-18 ज़िलां सारू शीतलहर अर कोहरा रो ऑरेंज अलर्ट।
- विकसित भारत यंग लीडर्स डायलॉग नई दिल्ली मांय सरू व्ह्यो- युवा कार्य अर खेल मंत्री मनसुख मांडविया कह्यो -देश रो भविष्य गढ़बा मांय नौजवानां रो खास काम।

000

केंद्रीय गृह मंत्री अमित शाह कह्यो है के किण ई प्रदेश री तरक्की मांय कानून व्यवस्था रो घणो खास काम व्हे है। श्री शाह आज जयपुर मांय करीब 10 हजार सिपाहियां ने नौकरी लागण रा कागजात संपण रा कार्यक्रम मांय बोल रह्या हा। वे कह्यो के ज्यीं प्रदेश मांय कानून व्यवस्था चोखी व्हे है वठे निवेशक ई निवेश करण माथे ध्यान देवे है। केन्द्रीय गृह मंत्री कह्यो के राजस्थान मांय चुनौतियां रे बावजूद ई कानून-व्यवस्था माथे खास ध्यान दियो ज्यो है। वे कह्यो के वो प्रदेश अगाड़ी बणे है जठे नौजवानां ने बिना सिफारिश नौकरी दी जावे है। श्री शाह कह्यो के भर्तियां बिना भ्रष्टाचार साफगोई सागे व्हेवणी चाहिजे। गृह मंत्री कह्यो की राज्य री भजनलाल सरकार प्रदेश मांय नौजवानां ने पेपर लीक ऊँ निजात दिलाई है।

000

श्री शाह कह्यो के मुख्यमंत्री भजनलाल शर्मा रा राज मांय प्रदेश मांय अपराधां मांय कुल 14 फीसदी जद के गंभीर प्रकृति रा अपराधां मांय 19 फीसदी री कमी आयी है। भारतीय न्याय संहिता री खासियत रो जिक् करता थकां श्री शाह कह्यो के नुवा कानून पूरी तरह लागू व्ह्यां पाछे एफ.आई.आर. दर्ज व्हेवण री तारीख ऊँ तीन साल री मियाद मांय सुप्रीम कोर्ट ताई री सुणवाई पूरी व्हे जावेला।

000

केन्द्रीय गृह मंत्री जयपुर री राजस्थान पुलिस अकादमी मांय मल्टीपल इंडोर हॉल रो उदघाटन कीनो अर चूरू ज़िला रा रतननगर पुलिस थाणा ने सब ऊँ बेहतर थाणा रो सर्टिफिकेट दीनो। कार्यक्रम मांय मुख्यमंत्री भजन लाल शर्मा कह्यो के वां री सरकार पुलिस ने और बेहतर बणावण सारू लगातार कोशिश कर रही है। इण ऊँ पैली केन्द्रीय गृहमंत्री जोधपुर मांय चाल रह्या माहेश्वरी समाज रा राष्ट्रीय अधिवेशन मांय ई शिरकत कीनी।

000

प्रदेश मांय 12 ऊँ 31 जनवरी ताई 'घुमन्तु पहचान प्रमाण पत्र' बणावण सारू सहायता शिविर लगाया जावेला। सामाजिक न्याय अर अधिकारिता मंत्री अविनाश गहलोत आ जाणकारी दीनी। वे बतायो के अ शिविर सगळी पंचायत समितियां अर नगर निकायां मांय लगाया जावेला। शिविरां मांय 'घुमन्तु पहचान प्रमाण पत्र' सागे आधार कार्ड, मतदाता पहचान पत्र अर जाति प्रमाण पत्र बणावण री व्यवस्था ई करी जावेला।

ई सारू गांवाई हलकां मांय पंचायतां अर शहरां मांय वार्डां रा क्लस्टर बणा र कैंप लगाया जावेला।

000

'विकसित भारत-रोजगार और आजीविका गारंटी मिशन (ग्रामीण) कानून -2025' ऊँ राज्य रा मजूर घणा राजी है। हनुमानगढ़ ज़िला रा न्यारा-न्यारा गांव वाळा अर मजूर इण ने ऐतिहासिक बताता थकां इण रो स्वागत कीनो है। गांव वाळां रो मानणो है के इण ऊँ गांवां मांय नौकरी-धंधा रा मौका बधेला। ज़िला रा एक मजूर बतायो के ओ कानून गांवां री माली व्यवस्था ने मजबूत करण सारू घणो खास साबित व्हेला।

000

प्रधानमंत्री नरेन्द्र मोदी रा विद्यार्थियां सारु खास कार्यक्रम परीक्षा पे चर्चा 2026 सारु चार करोड़ ऊं बत्ता विद्यार्थी ऑनलाइन तरीका ऊं नाम मंडाया है। विद्यार्थियां री आ तादाद लारला साल री साढे तीन करोड़ ऊं बत्ती रिकॉर्ड तादाद ने पार कर गयी। केंद्रीय शिक्षा मंत्री धर्मेन्द्र प्रधान आज सोशल मीडिया पोस्ट रे जरिये आ जाणकारी दीनी। वे कह्यो के परीक्षा पर चर्चा एक मोटो आंदोलन बण गयो है जिण रो मकसद नौजवानां सारु तनावमुक्त वातावरण बणावणो है। वे सगळा विद्यार्थियां ऊं ई साल रा परीक्षा पे चर्चा कार्यक्रम मांय शामिल व्हेवण री अपील कीनी।

000

राज्य रा ऊगणी, आतूणी अर उतराद हलकां मांय केई ठौड़ां जबरदस्त ठारी अर घणी धुंअर ऊं आवण-जावण माथे असर पड़यो है। बीती रात प्रदेश मांय घणखर ठौड़ां पारो 10 डिग्री सेल्सियस ऊं नीचे दर्ज करी ज्यो। दौसा मांय सब ऊं कम साढे तीन डिग्री सेल्सियस तापमान नापी ज्यो। अलवर, पिलानी, जैसलमेर, श्रीगंगानगर अर नागौर मांय ई पारो 5 डिग्री सेल्सियस ऊं नीचे रह्यो। ज्यादातर जिलां मांय दिन री बगत ई तापमान सामान्य ऊं नीचे दर्ज कर्यो जा रह्यो है। बाड़मेर मांय आज आखा दिन सीळो बायरो बाजण ऊं ठितुरन रही।

000

मौसम विभाग आज अठारह जिलां मांय शीतलहर, कोल्ड डे अर कोहरा रो ऑरेंज अलर्ट जारी कीनो है, जदके चार जिलां सारु येलो अलर्ट जारी करी ज्यो है। महकमा रे मुजब शीतलहर रो असर काल ई रहवेला अर आवता तीन-चार दिन ताई इण ऊं साता मिलण रा आसार नी है।

000

युवा कार्य अर खेल मंत्री मनसुख मांडविया कह्यो है के देश रा भविष्य ने गढबा मांय नौजवानां रो खास काम है। वे नई दिल्ली मांय विकसित भारत यंग लीडर्स डायलॉग 2026 रा उद्घाटन समारोह मांय बोल रह्या हा। श्री मांडविया कह्यो के ओ संवाद नौजवानां ने प्रौद्योगिकी, उद्यमिता, शासन, लगातार सामाजिक विकास सरीखा हलकां मांय न्यारा-न्यारा समाधान सुझावण सारु बधावो देवेला। केन्द्रीय मंत्री कह्यो के विकसित भारत यंग लीडर्स डायलॉग 2026 साल 2047 ताई विकसित भारत बणावण सारु नौजवानां री प्रतिभा अर रचनात्मकता री ओळखाण री प्रक्रिया है।

000

ई मौके राष्ट्रीय सुरक्षा सलाहकार अजीत डोभाल नौजवानां ऊं आवता बगत मांय विकसित भारत री अगुवाई करण सारु फ़ैसला लेवण रो बूतो विकसित करण बाबत् कह्यो।

000

जालोर जिला रा भीनमाल मांय महाकवि माघ अर गणित रा नामी जाणकार ब्रह्मगुप्त रो पैनोरमा बणायो जा रह्यो है। राजस्थान धरोहर प्रोन्नति प्राधिकरण रा अध्यक्ष ओंकार सिंह लखावत आज इण रा काम रो जायजो लीनो। श्री लखावत वीरमदेव, कान्हडदेव चौहान पैनोरमा बणावण रा काम रो ई जायजो लीनो।

000

चित्तौड़गढ़ मांय व्ही चौदह साल ऊं कम उम्र रा खिलाड़ियां री 69वीं राष्ट्रीय हैंडबॉल होड़ आज पूरी व्हे गयी। 6 दिन री ई होड़ मांय मेजबान राजस्थान जनरल चैंपियनशिप जीती। राजस्थान रा गोविंद जाट ने लड़कां अर हिमाचल प्रदेश री स्नेहा राजपूत ने लड़कियां रा वर्ग मांय सब ऊं बेहतर खिलाड़ी चुणी ज्यो। समापन समारोह मांय चित्तौड़गढ़ रा विधायक चंद्रभान सिंह आक्या कह्यो के सरकार पंचायत लेवल माथे ई खेलां ऊं जुड़्या सुबीता विकसित करणो तैय कीनो है। राष्ट्रीय हैंडबॉल होड़ मांय 1050 खिलाड़ी भाग लीनो।

000

बालोतरा ज़िला री वोटर लिस्टां मांय महिलावां अर नुवी परण र आई लुगाइयां रा नाम मण्डावण सारू आज खास क्लस्टर कैंप लगायी ज्या। आं रे मार्फत वोटर लिस्टां मांय नुवा लोगां रा नाम जोड़बा, जूना नामां मांय बदलाव अर सत्यापन रा सुबीता मुहैया करायी ज्या।

000

बारां ज़िला मांय 'राष्ट्रीय सड़क सुरक्षा माह' रा तैत आज गांव वाळां ने गुड सेमेरिटन योजना रा बारा मांय जाणकारी दीरीजी। वां ने सड़क हादसा रे कारण जख्मी लोगां ने एक घंटा मांय अस्पताल पूगावण परां केंद्र सरकार री ओर ऊँ 25 हजार रुपया रा इनाम दिया जावण रा बारा मांय बतायी ज्यो। वां ने बतायी ज्यो के जख्मी लोगां री मदद करण वाळां ने पुलिस कानी ऊँ पूछताछ सारू मजबूर नी कर्यो जावेला अर न ही अस्पताल मांय रुकण रो दबाव डाल्यो जावेला।

000

जयपुर—दिल्ली नेशनल हाई—वे माथे पावटा कने आज संवारे घणी धुंअर रे कारण रोड़वेज री एक बस सड़क री कोर माथे ऊबी पिकअप ऊँ टकरा र डिवाइडर माथे चढ़ गयी। ई हादसा रे कारण करीब 25 मुसाफ़िर जख्मी व्हे गया, ज्यां ने पावटा रा अस्पताल ले जायी ज्या। घणा जख्मी व्ह्या बस रा ड्राइवर समेत तीन जणा ने जयपुर रेफर करी ज्या है।

000